



^ 16
2366
2



和
2366
卷4-2



桂苑筆耕集卷之六

堂狀一十首



都統巡官侍御史內供奉崔致遠 撰

賀入蠻使廻狀

賀殺黃巢賊徒狀

賀收復京城狀

賀月蝕德音狀

賀內宴仍給百官

錢料狀

請降詔旨指喻兩浙狀

謝加侍中兼實封狀

謝落

諸道鹽鐵使加侍中兼實

封狀

謝弟祝再除綿州狀

請轉官從事狀

賀入蠻使廻狀

右臣得進奏院狀報入南蠻通和使劉光裕等廻雲南通和兼進獻國信金銀器物疋段香藥信馬等漢

使傳詔則星迴象林蒙王奉琛則雲集龍闕能舉羈縻之術果悛偏強之心若非聖上德叶棄瑕化敷柔遠則何以感鑿耳鏤身之衆啓隳肝瀝膽之誠彼越雉呈祥未爲盛觀旅獒入貢徒見良箴曷若正在艱時能安獷俗使雲南酋長再遵奉贄之儀天下賢良免獻征蠻之策斯皆相公魏絳陳利王商振威已令六詔歸投即使八紘清謐某比者南尋銅柱西鎮劔關曾施上將之謀免辱大君之命令今則遠聆盛事倍切歡心陳賀末由無任欣抃云云

賀殺黃巢賊徒狀

右得進奏院狀報定難軍拓跋相公保大軍東方達尚書奏於宜君縣南殺戮賊徒並生擒賊將又鳳翔李相公奏探知京中賊徒潰散六月十三日聖上御宣政殿排仗受賀者竊以逆賊黃巢稔惡旣多就刑非久敢驅烏合之衆屢拒鷹揚之師拓跋相公東方尚書或力微裔孫或曼倩餘慶皆申秘略共彌兇徒能順天誅遂陳月捷軍名定難雅稱關張之聲縣號宜君克符堯舜之德是以聖上高臨紫極遠耀皇威睹百辟之歡呼雷驚蜀國想六師之勇戰電掃秦川卽當靜滅氛霾永見均施渥澤此皆相公調鼎中之

味運堂上之兵右援袍而得功左執律而至獻勳功
相繼稱慶何窮某久阻淮夷尙淹海徼遠聆捷語但
切歡聲然必願劔拂狼星旗迎聖日終繼張飛之拒
後不慙聶叔之致師限守戎藩末由陳賀下情無任
踴躍之至謹奉狀陳賀謹錄狀上

賀收復京城狀

右得河中節度使王司空牒報四月十日當道與鴈
門節度使李僕射及都監楊驃騎下諸道馬軍齊入
京城與賊軍交戰約殺賊步軍一萬餘人其馬軍賊
便走出城黃巢亦未知存亡其逃遁賊徒尋差兵馬

追奔並已收復京闕訖者伏以逆賊黃巢藏姦匿暴
惡積禍盈久於輦下偷生固是檻中待死楊驃騎受
聖君之重寄李僕射傳飛將之雄名旣無慮於二心
果有成於一力想其霜鋒電擊月羽風驅壓雀卵之
威高燎鴻毛之勢猛遂使賊巢困不能鬪亂無所歸
雖爲漏網之鱗已是傷弓之翼則期加顯戮永掃羣
兇加以熊據六宮豕豕九陌今茲克復免致焚燒佇
望翠華便歸丹闕稍豁上天之怒實除下土之災此
皆相公靜運廟謀遠揚戎略旣叶一匡之妙道北極
何憂將流萬古之美談東封可俟某登壇有忝仗鉞

無功遠聽歡聲始除慙色限拘守鎮陳賀末由下情
無任抃躍之至謹錄狀上

賀月蝕德音狀

右伏見六月二十六日德音以太陰薄蝕曲赦三川
管內囚徒及委諸鎮收拾埋瘞京畿四面暴露骸骨
者伏以金精隱耀玉辰垂仁答天誠以震驚省風謠
而欽恤圓扉宥罪掃彗銷冤近鄙北齊號御囚而肆
虐遠遵西伯葬枯骨以施恩蜀山之草木先春秦甸
之煙塵永息此皆相公功成燮理道洽變通助日月
之光輝振雲雷之號令八方翹首萬彙歡心某跡繫

戎旃心馳台室阻隨班列莫遂歡呼下情無任抃躍
之至謹奉狀陳賀謹錄狀上

賀內宴仍給百官料錢狀

右得進奏院狀報七月一日於內殿宴百官仍令度
支各給三箇月料錢並奉勅旨迴駕之日應沿路州
縣切不得輒進歌樂及屠殺者伏以聖上繼周匡業
避狄興憂自幸成都彌資儉德守玄元之三寶達舜
帝之四聰徹彼珍肴掛其素服言唯罪已事不勞人
今者已復上京將迴大駕致栢梁之高宴盡醉千鍾
鄙鍊布之乏財均頒九府然後繼飛綸翰仍命繡衣

制郡邑之嚴科節道途之浮費既施令於好生惡殺亦停歡於八列九成王化斯行物情皆泰此皆相公手攜多士躬賀聖君駕行賦在鎬之章鳳藻詠濟汾之樂一時盛事萬代美談某限守藩條阻攀仙仗心馳蜀棧目斷堯樽下情無任抃躍之至謹奉狀陳賀謹錄狀上

請降詔旨指諭兩浙狀

右先淮浙西周相公牒杭州與浙東兵士鬪敵某遂具事由申奏請降詔書速令戢歛伏奉二月二十日詔旨已詔兩浙務在叶和者某當時備錄王言各移

公牒訖兼先差人賫書牒與劉漢宏尙書詰彼起戎之本諭其繼好之規今得迴書其言不讓唯稱周相公與董昌苟恃寵榮妄行威福虐侵近境阻截通津况有不同國之讎嫌又夫無蘊年之誓約必想見豺而戰猶能首鼠幸生已決加兵終期釋憾然則此無和氣彼有鬪心嘗膽者結怨既深抉眼者遺言可驗必恐以吳與越終當有越無吳實所謂夫差之麋鹿興譏范蠡之鼃鼃得便唯憂黎庶枉見殺傷輒再具狀奏陳請更飛詔止遏某徒圓鑿方枘避柱觸楹累陳高鳳之詞莫解子都之怒且讎因手足疾在腹心

久練師徒決期戰伐則也衛絲轉亂鄭蔓難除三人是仇百姓何罪伏惟相公贊成睿略施展廟謀俾陳兩武之事端唯仰一言之恩庇謹錄狀上

謝加侍中兼實封狀

右得進奏院狀報伏奉十一月十一日恩制加授侍中仍加食實封一百戶者伏以某材翰美箭業紹良弓早勤式遏之規敢怠聿修之訓遂得一分戎闔七換師壇提漢法之重權陟秦官之極品恩榮獨盛績効何申况自蠶尾之徒蝟毛而起神州傾陷御輦巡遊不能踴躍用兵有類遷延之役雖進退惟命不敢

爭功而行藏相時豈無懷愧而又積山煮海瓜剖豆分莫成贍國之權徒竊經邦之位唯甘廢棄永見沉淪敢期渥澤之無私俯念涓埃之有效許登玉署高戴金璫仍忝真封式加懋賞且如講能奪席諫切引裾方升鸞渚之榮俾稱鳳池之望豈伊孱劣所可貪叨此皆相公仰贊萬機俯安九牧無使怨乎不以能令可者與之唯當三命益恭一辭無退入則撫安疆圉出則誓掃氛霧佇成滅寇之功冀贖曠官之責戎鎮有限不獲陳謝下情無任感恩兢懼之至謹奉狀陳謝謹錄狀上

謝落諸道鹽鐵使加侍中兼實封狀

右某伏奉去年十一月十一日恩制加授侍中並餘如故仍加食實封一百戶落諸道鹽鐵使者伏以君親委任固能捨短從長臣子忠勤唯願從微至著某一司權課六換暄涼正逢多事之秋莫展牢籠之用况自頻更統帥別致租庸既當狐讓千皮實見羊分九牧贍軍富國固絕籌謀熬海鎔山幾隳條貫今者聖上怒其不逮察以無私將漢法之重權委儒流之妙術豈料更畱宸慮猶念戎勳許登負璽之班資不替擁旄之寵寄尚假極品重增實封當主憂臣辱之

時若斯榮盛審福過災生之理何以遑安此皆相公曲庇庸虛全忘僭忝俾息躬於負重當銳志於專征寧無淬礪之功仰答陶勻之賜此外以榮爲懼至末如初下情無任感戴兢惕之至謹奉狀陳謝云云

謝弟祝再除綿州狀

右件官是某堂弟今得進奏院狀報奉某月某日恩制除金吾將軍被本州官吏衆狀舉畱續准勅旨依前充綿州刺史某嘗讀後漢書見寇恂爲潁川守後拜金吾從上經過潁川郡人遮道願借寇君乃畱一年以慰百姓此實國家殊寵郡邑美譚萬代之來一

人而已誰知盛事得屬鄙宗安貧恤孤潁川之政化
雖乏出官入仕子翼之官資略同感深而喜作悲端
效淺而榮爲懼本伏以高視粗閑吏術忝荷君恩分
憂而地壓劔關理俗而塵銷鈴閣今者纔升緹騎却
擁朱輪謂施撫葺之能特徇衆多之請此皆相公愛
忘其短仁及於微仰贊帝俞俯從羣願某唯知提訓
俾慎揣摩同驅軾下之熊但期靜理雖睹堂前之鸞
免恨分飛限守戎藩末由陳賀云云

請轉官從事狀

某官薛礪

右件官閔損登科良由德行陳琳從職實假詞華林
幽而轉識芝蘭木落而方知松桂深敦操尙夙著幹
能遠叨分闡之榮唯藉運籌之妙伏請轉官仍改章
服轉充觀察判官

某官鄭倣

右件官早登上第久佐大藩能修檢慎之規每助撫
綏之政賓筵所重健筆爲先伏請轉官仍賜章服轉
充節度掌書記

某官顧雲

前件官東筠孕美南桂抽芳曳謝朓之長裾從衛青

之軍幕五殺皮之為重豈謂虛譚百鷺鳥之不如方
知實事良資妙畫共展壯圖伏請轉官仍賜章服充
觀察支使以前件狀如前伏以某遠率舟師誓除國
賊征帆則雲掛行色戰鼓則雷含殺聲畱務既繁良
籌是托或倚幕中之婉婉或求馬上之翩翩輒具薦
論仰希甄獎不拘月限別覬天恩伏惟相公庇護戎
藩激揚賓席稍超常例特受清資略假潤於丹青許
分榮於朱紫所冀元戎十乘速成討罰之功越府三
才各得施張之處已具狀申奏訖云云

桂苑筆耕集卷之六

桂苑筆耕集卷之七

別紙二十首

滑州都統王令公三首

鄭畋相公二首

史館蕭邁相公

度支裴徹相公

租庸王徽相公

前太原鄭從讜尚書

禮部夏侯潭侍郎

吏部裴瓚尚書二首

宣歙裴虔餘尚書二首

鹽鐵李都相公二首

盧紹給事

壁州鄭凝績尚書

泗州鄭庾常侍

湖州杜孺休常侍

滑州都統王令公

伏見制書伏承榮加內史之任暫執元戎之權往鎮

雄藩誓殲窮寇佇復宮闕則歸廟堂九重之倚賴如山八表之歡呼動地而况令公志勤捧日力贍補天三秉台衡兩分戎律入則建蕭何之功業出則振黃霸之恩威此皆羣議稱揚不假拙辭贊詠今者聖上以叛徒乘便尙敢俯張諸道徵師互相逗撓蠢彼之姦兇未弭赫斯之憤怒良深遂輟股肱遠資心膂薦赦宰楚設前茅後勁之規管仲相齊致九合一匡之譽是以榮轉西臺左相請爲東道主人儒武全材古今罕遇伏想近承睿略嚴令諸侯誠知白馬封疆幸而獲賴必料蒼鵝羣黨困不能飛卽當立剗梟巢去

迎鑾駕海晏而永興龍德池清而再睹鳳儀凡在含靈皆增係望某靜思奮擊動見悔尤四隣多是異心十道竟誰同力今所以自賀者得逢知己親摠貞師巧脣無所構之端壯膽有可傾之處唯冀遙稟大將軍之命用勵驍雄仰憑眞宰相之威永除妖孽末由陳賀下情不任欣慰瞻攀虔祝云云

第二

伏睹制書伏承榮膺寵命正鎮雄藩伏惟感慰竊以動惟佐聖靜乃優賢百穀垂成則暫停霖雨八紘向泰則貴息兵戈詎勞有道之人久練不祥之器羣情

既鬱帝命斯行令公獨竭忠誠克扶厄運當六師扈
從司南之制度無虧及十乘啓行逐北之威稜有裕
但屬王事靡盬人心不同祖豫州志在誓江佇申壯
節蕭相國力謀佐漢或致游詞今以小寇必殲大臣
于役慮失華夷之望倍興宵旰之憂遂乃鳳紙傳恩
遠離西蜀蜂旗卷影却到南燕指蹤既稟於成謀搏
噬佇看於衆旅坐驅十道臥理百城顯爲出入之寵
榮保就始終之勳業某夙銜深獎繼奉好音覽古人
賀滿之言睹君子持盈之節抃慰攀戀不任下情伏
惟云云

第三

伏承旌幢已到鎮上訖伏惟感慰令公手傾霖雨身
耀福星三入廟堂已超仲父一匡寰宇更屬何人昨
者十乘啓行九重軫慮以爲螢不勞海灌卵何假山
摧遂請元臣却臨重鎮今則徐迴龍節靜撫雄師下
車而恩澤均沾舉扇而仁風廣振南燕受賜北極紓
憂某早荷獎知倍增欣慰云云

鄭畋相公

伏見二月六日制書伏承相公正居宏父光弼聖君
兼摠蘭臺再調梅鼎凡云遠者近者莫不舞之蹈之

伏以相公碩德茂勳雄才奧學播在四方之口沃於萬乘之心固絕贊揚但增瞻仰况自關中聚寇岐下屯兵率先諸侯累展奇略是以才趨鳳輦便陟鸞臺遠涉山川行就九天之寵克平水土坐升百日之榮竹宮既託於清規芸館更歸於雅望則乃孫叔敖之慎守愈貴愈恭胡伯始之累遷有倫有要永憑上德佇賀中興使仲父執鞭鄴侯捧轡驅蠹動入華胥之域格蠻夷歸虞舜之風某早沐深知遠聆殊拜末由陳賀抃聳倍深云云

第二

伏承太保相公累陳章表懇讓勻衡暫輟任於股肱果優賢於羽翼緇衣纘美青綬加榮守難進易退之規叶居安慮危之道莫不宸扆欽矚搢紳詠歌而况相公比者統冠甸侯深攻國賊唱義聲而飛羽徼管爵賞而練甲兵方驅破浪之風佇滅燎原之火而乃腹心有疾牙爪無功何君子之見欺實小人之難養然而災爲福始小往大來再秉洪勻遠安仙蹕調鼎中之實味運堂上之奇謀決勝漢籌弭災魏闕皆憑蕭丞相指蹤之力豈假鮑尚書統集之兵咸推第一之功能贊登三之業今則奉身有裕止足無虧將尋

疏傳之高蹤乃訪畱侯之故事用黃石公之妙略蔚
爲帝師從赤松子之勝遊別作仙侶雖云獨樂其奈
衆情氛曠餘妖方願靜銷於天下陶鎔重望豈宜久
滯於山中必計才返鸞旌請歸鳳闕永使蜩螗罷噪
仍令鹿馬分形深荷眷私况聯親懿依攀禱望可鑒
遠誠拜賀末由悚戀增切云云

史館蕭邁相公

昨睹制書恭承高辭大計正陟中台兼升史館之榮
實副儒門之望竊以冊書所重筆削爲難別成一代
之楷模夙掩百王之規矩是得宸衷妙選朝列具瞻

而况相公眞君子儒老成人德允釐百揆顯贊萬機
今者邦計旣豐國經斯整東西臺之極位揚歷無遺
左右史之直言裁成有類莫不勛華表德游夏緘詞
能施補袞之功備載垂衣之化必使褒眞貶僞彰發
傳之體有三激濁揚清勵事君之心無二古今盛美
遐邇欽依某遠守藩維忝資陶冶每慎六條之理敢
希一字之褒抃躍所多啓陳無及伏惟俯賜念察

度支裴徹相公

伏睹除書伏承相公再履台席榮均賦輿凡在生靈
莫非欣躍某今之所賀者眞以天上之福與大國之

幸不欲更牽俗禮強飾繁詞然而歡心有餘祝史無愧敢陳贊詠冀豁懇誠伏以相公德襲清通道資恭儉歷遊華貫高陟台衡當聖君巡幸之初見賢相燮諧之業而乃鵠原陷難鳳閣辭榮暫屈跡於外藩尋秉權於大計今者天將悔禍日待升平果請英才却歸舊位躡周司馬統兵之秩騁晉尚書較運之謀四方所傳一意相賀某每慙薄伎偏荷殊私再逢調鼎之期實切彈冠之望末由陳賀但增攀戀簪抃之至云云

租庸王徽相公

伏睹制書伏承榮膺寵命伏惟感慰伏以萬乘巡遊最難畱事百官毗倚允屬持綱况當返駕之時尤重清宮之禮膺茲寵寄實在賢能司空相公靜抱長材動施餘刃報主安人之業早冠鼎司東姦芟弊之名已諧輿論今者鴈鳩命氏鷹隼揚威內清輦轂之塵外肅關畿之地聖君新命永託中庸司隸舊章佇觀大禮某忝承眷獎欣抃實深云云

前太原鄭從謹尚書

得河中王相國書報伏承相公榮膺寵命將赴京國伏惟感慰伏以宸遊既遠居守是難須倚元臣方安

聖慮是故昔漢帝曰吾與僕射何異則知重寄別表
顯恩而况相公岳立儒宗川流相業頃辭鳳閣遠耀
龍旌郭伋示信之鄉廣沾恩化周舉移書之地遍活
疲羸肅軍令於貔貅振兵威於獬豸求安邊境胡雛
不敢南侵遽值妖氛周馥久勞西狩今以玉京雖復
鑾輅未迴輟戎略於藩垣託繁機於宮闕必計中和
樂職已繼雅音司隸舊章卽興盛禮然後重調梅鼎
永對奠階贊成天下之春固是穀中之事凡云品彙
莫不欣歡某早忝恩知倍增抃慰末由陳賀但切依
攀云云

禮部夏侯潭侍郎

伏承榮膺寵命伏惟感慰侍郎泰初朗鑒日月難踰
孝若美姿風塵莫染儒室別開其戶牖相門必繼其
弓裘是以始於憲府宣威便見儀曹主貢履歷而皆
遵仙路操持而永振貞風栢列朝霜昨日揖登臺御
史桂開夜月今朝選入室生徒採珠而蓬島待空搜
玉而藍峯寡色副天下正人之顒望息場中藝士之
屈聲某早沐眷私不任欣抃云云

吏部裴瓚尚書

伏承榮膺寵命伏惟感慰竊以勛華聖代唯務舉能

邵泰賢流共推取實用捨既歸於重柄古今皆託於
長材人望所諧主恩斯在尙書情疎宦路性悅道風
月高而霜鶴數聲雲卷而蓮峯萬仞早知厄運久避
囂氛洋川之瑞草仙花幾牽蝶夢閨苑之朝嵐暮靄
深潤豹姿然而陶勻難住於山中塗炭待平於天下
遂辭肥遯來謁宸遊果登銓管之司允洽簪纓之望
昔年掌貢搜海嶽以皆空今日掄材酌淄澠而不混
清通所莅淆亂必除歷居六郡之峻資終補三台之
缺位遠祈邇禱匪夕伊朝某早仰仙標遙欽懿範抃
慰瞻望不任下情云云

第二

伏以禮稱選士實資秀孝之科書貴知人允屬銓衡
之職君命既將歷試物情固得僉諧而况侍郎雲鶴
性情天驥行止瓊窓近日高批帝語於筆端絳帳生
風妙選羣才於門下洎湖湘察俗瀟洛尹都便宜入
秉化權坐匡聖略直以手能持滿心切避榮唯求勇
退之謀久阻急徵之詔萬乘夢思於隱霧四方渴望
於爲霖今者移黜陟之司託清通之鑒何假山濤之
密啓能遵李重之良箴永期涇渭分流必使輪轅適
用某每思玉昆金季皆辱眷知松茂竹苞深敦交契

禱祝瞻戀並同衆誠伏惟云云

宣歙裴虔餘尚書

伏承榮奉徵詔將赴闕庭伏惟感慶兼極今者妖氛
向息聖運重興諸葛亮之用兵已非急務叔孫通之
制禮方藉賢才以尚書望積臯夔政成宛句三年察
俗以仁義爲先四境懷恩俾寇戎自戢是得傅巖結
夢宣室飛書黎庶傾心莫遂攀轅之懇君王聳耳待
聽曳履之聲况乃親侍安輿榮趨帝輦佇聆調鼎永
使建纛豈獨關中又安實爲天下幸甚某久隣仁境
深飽德風抃慰瞻攀不任誠懇云云

第二

特垂手筆榮函兼示陳情表藁捧尋無斃欣賀有餘
且近者時風僅訛孝道多缺事親則薄奉已爲先只
將奔競榮身不以違離介意今睹尚書遠辭徵詔懇
致奏章叙向來爲國分憂不矜茂績請從此於家就
養實稟格言况尚書若赴行朝必登相位而乃不親
梅鼎願奉板輿是逃台衮之榮唯戀斑衣之樂永使
李密之表萬古齊名仍令束皙之詩千秋長價有以
見聿修令問橫勵時流豈唯上德之美譚實乃中興
之盛事拜賀末由但切攀依之至云云

鹽鐵李都相公

伏承榮膺寵命兼掌漕運伏惟感慰伏以鑄山熬海
既標富國之權紫帳皂檐固是安邦之彥况從多事
諒託全才相公中庸日彰大任天降舟楫暫妨於援
溺棟樑必俟於扶危今者三年禮成萬乘恩至假途
端揆正位司元憑孔僅之智謀繼齊桓之霸業必也
廣施奇計遍致豐資答上帝之殊恩振中興之盛事
凡云品彙孰不欣歡某每慙糠粃居前久阻鹽梅入
用主張多失固難稱老成人交代叨榮無以告新令
尹并慰兢惕不任下情拜賀末由攀戀空切云云

第二

每辱榮緘卽垂虛譽周顛齊名於樂廣固是懷慙韓
非接傳於老聃實爲過望荷戴增切兢惶益深伏以
相公宋劔倚天魯戈駐日再居重任大洽羣情必計
海若傾心廣潤煎熬之利山靈効力助成鎔鑄之功
便令流馬飛牛終得踰千越萬國用則立期饒羨廟
謨則坐致昇平勤王之誠在我而已伏惟遵護用慰
禱祠其他下誠已具前狀云云

盧紹給事

近睹除書恭承賢兄左丞榮膺寵命伏惟感慰竊以

國有司直野無遺賢蓋前代之所難實我朝之獨盛
况乃上可以紉彈八座下可以整肅百官永言其才
固屬全德賢兄左丞中庸處厚大雅含清柱晴空而
嶽頂無雲瑩秋色而潭心有月是得歷游華貫輝綽
令猷頃遇分憂暫作甘棠太守尋聆徵詔請爲仙桂
主人此時也歡聲則風振儒林喜氣則雲鋪筆陣有
口皆賀無心不歸蓬島靈珠想離領下荆山瑞玉待
入掌中而屬鶯谷藏春鳳城陷寇不見孔門盛事唯
傷魏闕餘災今者遠從行朝久臨憲府旣躡清資於
侍極榮升重位於肅機傳咸之畏慎無虧鄭晉之矜

莊有裕正當今日必繼芳塵給事避地經時陟崗勞
念今聆美拜稍慰遠思然每於絳帳馳心共懷遺恨
須到洪勺入手方洽羣情高接鴈行佇迎鳳詔虔禱
瞻戀無以披陳云云

壁州鄭凝績尚書

伏承自小司馬假大宗伯出刺始寧伏惟慶慰竊以
進有致君之志共託阿衡仕無擇祿之言常聆季路
綽然遺範宛若合符尚書玉樹一枝金山萬仞雅望
全騰於八海華資緩步於五雲漢丞相之傳經永光
儒室周司徒之善職固屬高門况乃於國於家曰忠

曰孝比者黃巾犯闕翠輦省方尚書暫別鯉庭遠趨鳳展高提夢筆仰贊宸猷稟大聖之指歸立中朝之張本此實爲人臣之忠於國也今以聖主優賢嚴君遜位尚書固辭武部峻陟儀曹榮掛萊衣俾歌廉袴毛義之喜難自己胡威之清必衆知又爲人子之孝於家也莫不事標雙美譽冠一時今彼郡而昔彼州豈能較盛出傳舍而入官舍未足齊榮佇見風扇揚名雲屏隔位隼旗高建免勞陟岵之詩龍鼎待調卽展濟川之業某早銜眷獎常切禱祠拜賀未期瞻攀無極云云

泗州鄭庾常侍

伏承已到貴鎮上訖伏惟感慰昔鄭弘爲臨淮太守熊初架軾鹿乃挾翰旣傳一郡之政聲終陟三公之寵秩果符瑞應永振美譚今則常侍族茂山東威臨泗上實繼巨君之芳跡足分聖主之遠憂况乃沛師戢兵淮民復業懸一城之愛日振四境之和風羣情允諧新命非遠某近封斯接殊眷先垂抃慰瞻攀但切誠抱云云

湖州杜孺休常侍

昨睹除書伏承榮膺寵命再理吳興伏惟感慰常侍

比臨霽水大振袁風適聆高握新蘭又見重分舊竹
實謂政聲日洽人欲天從徵黃太守之書却隨鳳去
借寇使君之衆迎得春來自此煙封茗畦月挂蘋渚
不詠洞庭歸客即吟金谷主人再樂三年終蘇一境
然後入居青瑣坐演紫泥福庶品而既多掌陶勻而
不晚某早銜殊眷并慰實深拜賀末由瞻馳倍切云
云

桂苑筆耕集卷之七

桂苑筆耕集卷之八

別紙二十首

泗州于濤常侍

西川陳敬瑄相公

徐州時溥司空三首

諸葛爽相公二首

湖南閔頊尚書

幽州李可舉大王四首

滑州王令公

鹽鐵李都相公二首

龍州裴峴尚書

西川柳常侍

史館蕭邁相公

三相公

翰林侯翱學士

泗州于濤常侍

常侍榮戴貂冠遠驅熊軾能施善政遍恤疲氓暫牧

雄州已安樂國斯乃鄭巨君之甘雨再潤淮邊卜子
夏之儒風重興泗上况屬彭門叛亂仍當汴路艱難
獨守危城終摧敵壘果成茂績實驗全才且羣師悅
挾纊之心鄰孽縮吞舟之口仁者有勇信非虛譚某
昨奉詔書許令軍賞設爵而唯憑帝命舉賢而實契
私誠今則寵換銀璫威兼鐵柱敬申厚禮用報殊功
楚岸風聲處處而既傳滅寇隋堤柳色年年而祇望
行春拜賀未期瞻思頗切某公牒同封送上云云

西川陳敬瑄相公

伏睹除書伏承相公以祝鳩之榮兼戴貂之貴禮登

八命寵冠三台伏惟感慶兼極伏以掌邦教之司無
人則闕負國璽之任有德始居昔丁固休徵終叶生
松之夢戴憑奧學會標奪席之名然十八年而既居
後時五十重而何益於事曷若相公雄臨玉壘榮奉
金輿昔也坐振風謠作一方之慈父今乃立迎天寵
爲萬乘之主人使西夷免怨於後予南詔永知於戀
聖是以秩歸鳳闕化洽龜城躡高蹤於黃闥紫扉耀
偉質於朱衣皓帶豈獨一時之盛事實爲萬代之美
譚某早沐眷知不任欣抃云云

徐州時溥司空

竊以誓於晉乘則重其執贄往來諷以楚詞則愧彼隨波上下永言有義有禮唯在知和而和况乃仁境接邦之彥兮善鄰存國之寶也始終相契今古何殊去春特辱長牋兼貽厚幣使者乃和門上校貺之以華棧大宛引夏殷罪已之言鋪陳數幅舉邾魯息民之義撫綏近封有以見真男子之用心古諸侯之行事其於景仰豈可弭忘今遣專人聊馳微信匪足爲報永以爲好伏惟照察

第二

司空利器倚天忠誠貫日授律而舉無遺策訓戎而

動有成功昨者窮寇驚奔銳師薄伐審麟史追逃之勢展豹篇決勝之機靜剗羣兇暗梟戎首范丹縣側雷威騰肅殺之聲季氏山邊天罰示告成之慶久畱盛績終屬雄才所謂有非常之人然後有非常之事絳灌亦一時俊傑關張非累世勳庸鏤姓名於金鼎玉鐘飾儀形於雲臺煙閣永言盡美孰敢爭先某幸接德鄰深遵義路每增欣賀固異等倫云云

第三

特辱長牋俯傳大捷誘賊將而暗除梟帥剗羣兇而遍戢豺聲夫何壯哉誠可畏也且黃巢謂逃天得計

乃揆日偷生書罪則竹乏南山流惡則浪乾東海逞
暴於鋸牙鉤爪挺災於金闕玉京煙氛所侵塗炭皆
匝諸道遞相逗撓別自倂張驅兵而未暇舉旗喪律
而先聆返旆養姦既久翫寇何安若非司空以當春
滋雨露之恩則坐迎龍節及初夏順雷霆之怒則立
展豹韜遂得纜發銳師果殲窮寇刷國家之積憤弭
州縣之餘殃所謂三年不飛終當一戰而霸况可飲
頭而快意何須擢髮以論辜有以見報聖天子之恩
固須待舉真將軍之令幸聯仁境先聽好音欣抃欽
矚翰墨何寄云云

諸葛爽相公

伏承親提師旅遠赴戰征跋履山川蒙犯霜露不審
近日尊體何似急景凋年寒威肅物令行麾下盡忘
鞍瘵之傷望峻寰中將救瘡痍之患必有百靈薦祉
七萃成功遠揚邵元帥之高名近繼郭汾陽之雄略
則銷氛履遍活烝黎有心之徒引領而望伏惟每加
保重早副禱祈遠誠所望云云

第二

訪聆賊巢自逃商嶺久徧許田蔡師相連狂鋒尙熾
當使以道途遠隔行止難知未施綺鹿之能但養斬

蛟之勇伏承相公親麾八陣深運六韜將靜掃其羣
兕已齊驅其銳旅既見三冬擐甲卽致殊功方知五
月渡瀘誠爲易事諸道固當高枕聖君便可廻鑾而
未測鯨奔須防獸搏凡居戎閫合審軍機輒遣專人
遠偵賊勢幸垂示及冀助討除伏惟照鑒謹狀

湖南閔頊尚書

親故前河西朱大夫到遠垂書示深荷眷私兼將尚
書弄馬圖及貴府祥瑞事跡相示閱覽忘倦欣仰有
餘且武藝所稱歷朝可數楚誇徹札魯銜蒙輪轡三
百斤之長弓嘗傳漢史掉八十斤之雙戟亦著魏書

然而唯守一隅莫能四達長於射而短於御力甚壯
而心甚怯永言戎伎難遇全才今者尚書術繼白猿
名高赤兔旣占萬人之敵眞爲一代之雄雖居仗鉞
之榮不忘據鞍之勇爰徵粉繪妙寫風儀遍覽左旋
右抽唯知目駭神聳彼繫繩逞捷運甓服勤實謂區
區瑣瑣者爾况乃夢符捧日政洽觀風花竹呈祥果
驗中興之運龜龍薦感皆標上瑞之姿若非望重行
春歌喧來暮則何以三軍效勇永諧欽化之名七郡
懷恩盡表殊常之應必期渥澤繼入瀟湘此則但睹
其電擊雲飛鷹麟鸚視每勞企想無以喻言唯望慎

舉政條仰酬寵寄方值四郊多壘實憑萬里長城其
他中心藏之永以爲好幸垂諒察云云

幽州李可舉大王

不審自履初夏尊體動止何如伏想趙盾日威雄臨
北塞袁宏風化遙助南薰固當九郡懷恩百靈薦祉
符提白玉儼標萬里之長城臺築黃金遍啓四方之
賢路豈止應掛絲之夢自然超衣錦之榮伏惟精慎
寢興別迎寵冊永扶昌運大洽羣情今遣諸葛果卿
假以郵巡修聘旣愧未成好幣又慮或失良材無限
遠誠各具別狀云云

第二

雲龍在想風馬異區末由傾蓋之誠空切着鞭之望
雖傳鱗翼莫寫肺肝况某俯顧家門忝同里閭每詠
維桑之什卽懷喬木之恩幸蒙侍中大王不賤家丘
深知國產曲垂厚獎頻辱好音然則苟能知心何假
會面以斯佩荷可鑒依攀今緣國患未除鄰讎不戢
甚欲慎言結舌其如憤氣填胷略假牋毫具陳事實
恃惠子之知我望明王之鑒賢伏惟恩私遠察誠素
云云

第三

伏以蜂蟻巢窠猶能稔惡熊羆隊伍未見摧兇在於
義士忠臣莫不痛心疾首某蓋謂去年奉詔遂於近
境旋師然今若終不自行必恐竟無所就已從中夏
遍閱大軍待剗淮戎卽登汴道但以指其百勝決此
一行人不異心事希同力侍中大王族榮周姓爵貴
漢封固多報國之誠常貯安邦之術見茲禍難忍不
憂勤某旣事征行輒申控告伏望差借兵士助平寇
戎得貴藩精騎五千勝諸道羸師十萬佇收京闕尅
在旬時亦已先具奏陳所貴免成專輒申包胥之告
急與此雖殊趙充國之請行于今可試幸垂亮察必

賜允從不敢獨擅茂勳所冀均分重賞忠誠之切實
在於斯伏惟永存始終早示可否未間顛望可想眷
翹云云

第四

別奉榮緘遠搜古籍其於降歎無以喻陳且近者列
土諸侯盈庭多士唯以宦塗銳志少於儒術畱心而
乃侍中大王博古通今去華取實燕碣石之接土已
繼芳蹤漢維城之好書遠符仁旨是以訪遺編於汲
冢尋墜簡於魯宮然則荆軻易水之歌徒矜壯氣召
伯甘棠之詠虛播政聲豈若博采聖人之書用光君

子之道但懷鑽仰敢覬切磋况某久擁戎旃難親講席耽讀闕五千卷之數藏貯無三十車之多自奉指蹤願申誠懇遍令列肆廣集異書冀資日益之功寧憚風詠之過必可徵名東觀承乏西齋伏惟俯賜鑒察云云

滑州王令公

某蒙恩忝官不任感懼某粗傳堂構謬荷國恩然而術略素貧勳勞甚淺早分相印累陟師壇每遇福過災生蓋爲材微任重一自四郊多壘萬乘蒙塵未施毫髮之功深負咽喉之寄羊皮狐腋空思趙簡子之

言瓦釜黃鍾寧免楚大夫之歎既難展用唯願退閑方欲瀝血拜章奉身請老豈料更隨衆例亦忝殊榮遽登常伯之高資復益實封之異寵伐檀可懼橫草何申伏緣遞路不通制書未到先垂榮問過辱獎詞既聆天上之音不愧月中之夢末由陳謝但切兢惶云云

鹽鐵李都相公

某蒙恩忝官不任感懼伏以納言峻秩眞食殊榮有扶持社稷之功有燮理陰陽之術方居正位允洽羣情如某德乏潤身智慙周物况逢多事未展壯圖動

無効於啓行靜有能於臥理加以久司筦貨實寡籌
謀既虧於富國贍軍深愧於木牛流馬唯甘黜削永
遂優閒豈料聖澤無偏戎藩有忝駟飛畫鹿昔年而
莫見休徵冠聳豐貂今日而愈慙非據仍加班邑何
報聖朝此皆僕射每賜保持得榮交代唯期勵節共
願匡時陳謝末由依攀益切云云

第二

竊以世途易變時事難言泛泛如水中自安滔滔者
天下皆是雖董卓已燃巨腹衆切歡呼而桓彝若有
忠魂潛應慟哭每窺師律空激壯圖今則大駕未旋
外藩多難獲利者唯謀潤屋握兵者誰解清宮當道
雖乏供須但勤貢獻願早迴於御輦難空倚於賦輿
割占所因指撝斯在必希朗鑒深察鄙誠其他卽遣
專人冀具後狀云云

龍州裴峴尚書

遠勞專介特枉華緘發函睹不滅之蹤滿幅示相憂
之旨其於佩惠何以寄言且國步猶艱天心難測忠
直者韜聲戢影姦邪者鼓舌簸屑彼旣一時此須三
黜唯當竭節豈足興言尚書偶值危時暫淹雅望將
期歷試無限卑栖寵辱若驚周柱史非無意也行藏

自保魯司寇有是言乎多謝故人勉報聖主分憂救
瘼爲政非輕志操不虧恩榮斯在伏惟諒察云云

西川柳常侍

某頃鎮龜城別營雉堞蓋符天意得就土功今者幸
遇巡遊謂申績効久畱御輦俾立豐碑杜元凱方愧
勲名李玄感敢言德政雖忝當功受賞其如見寵若
驚常侍直道而行樂人之善遠垂華翰過辱獎詞以
永傳不朽之譚先見未來之事可使美掩蜀都之賦
高齊劔閣之銘荷戴兢兢無以指喻伏惟照察云云

史館蕭遘相公

某日無勞効天降寵光雖雨露常均不辭潤物而丘
山漸重莫遂安身况蒙相公察以獨立聖朝勤行直
道迥垂芘賴免使湮沉既闢洪爐辱陶鎔之厚賜仍
揮彩筆煩刻畫之妍詞以爲動有成功前無強敵撫
寧淮甸靜戢煙塵繼陳任土之儀遠瀝望雲之懇遂
使榮升畫室特解牢盆更增班邑之恩尙假統兵之
位仰窺華翰俯揣凡材未能息多壘之災何以竊長
城之譽唯期激勵少報生成拜賜未前懷仁益切云
云

三相公

某蒙恩忝官不任感懼伏以風后古官是聖代弼諧所重國僑美賞非賢才負荷固難必也挺秀儒林鉤深學海方可奪席占五十重之譽享秩稱二千石之榮如某任重咽喉功微毫髮早提兵柄不能靜剗寇戎久握利權無以廣資經費雖進退每從於帝命而否臧實愧於軍謀以茲責躬無所逃罪但願罷歸林藪絕望雲霄豈料宸襟猶傷墜履自上安下方慙畫鹿之幡居高飲清忽戴附蟬之冕解煩難於平准增寵祿於實封此皆相公啓導睿慈庇安戎律使貞金鍊火免銷耗於毒煙直材摧霜更敷榮於聖日唯當

親驅銳旅遍討羣兇冀成破竹之功少贖伐檀之刺末由陳謝悚惕增深云云

翰林侯翽學士

某材略素貧勳勞甚薄謬蒙睿渥累陟華資今者拜以古官加之眞食伏蒙學士親奉宸睠過垂獎詞煩郭璞之彩毫榮勝軒冕使夷吾之瑣器頓異斗筭遭逢實契於百生銘鏤豈唯於一字但冀仰憑筆陣更鍊戎韜充國壯心早遂征行之望無鹽陋質免慙刻畫之恩荷戴兢兢不任誠懇末由拜賜但切依攀云云

桂苑筆耕集卷之八

桂苑筆耕集卷之九

別紙二十首

都統王令公三首

浙西周寶司空五首

宣歙裴虔餘尚書三首

壁州鄭凝績尚書二首

太保相公鄭畋

護軍郗公甫將軍三首

前左省衛增常侍

泗州于濤尚書二首

都統王令公

近者專馳賀狀伏計已覽卑誠久絕來音但多景戀
令公始終陶冶表裏經綸王商能止於訛言謝萬暫
提其勁卒奪窮寇姦兇之魄活疲毗震懾之魂行既
順天捷當克日某比承詔旨久緩師期今伏見令公

命許君親身先將校幸叶彈冠之望倍驚投袂之心
已閱全師既離弊鎮雖自稱岸上之虎或謂當仁而
不畏水中之龍實歸重德唯期助役非敢貪功欲取
來月上旬決謀進退直衝宋野先會梁園謹遣專人
咨探行李輒覬廻信聊紓遠懷伏惟恩私深賜鑑察
云云

第二

累專寓狀粗得輸誠繼奉榮緘益銘殊眷不審近日
尊體何似夏星沒火秋琯飄灰佇妖氣之雪銷想軍
聲之雷振伏計振振君子之德仡仡勇夫之誠足可

憑有慶之威誓無譁之衆功期一舉勢必萬全謝太
傅之智謀預知大捷鮑參軍之歌詠唯佇中興伏惟
慎保節宣用諧時望某常銜曩顧况捧溫言朝禱暮
祈可量卑懇云云

第三

某自承令公親率銳師佇殲窮寇便謀訓練欲赴戰
征願折豺牙仰瞻馬首履山川而犯霜露久決心期
擐甲胄而峙糗糧早成力辦不料徐戎忽聚費誓猶
陳未豁征途難通饋輦以此早申誠懇但切憂惶伏
想萬夫爭殲弩之先八表望建纛之令佇見龍歸魏

闕却迎鳳舞荀池雖居喙息跛行盡解口祈心禱某
早窺偉量遙稟壯圖仰視旄頭漸覓奔藏之處俯看
屐齒唯懷斷折之虞恭竢捷音專申賀禮未前祝望
不暇啓陳云云

浙西周寶司空

昨奉緘翰兼寄示書碑樣眷私既深披閱無倦其於
榮抃無以喻陳某每念久握兵戎累移節制雖纘弓
裘之業未揚鍾鼎之勳况乃來暮歌稀行春化拙豈
期睿獎特采微勞許標不朽之規遠降非常之寵至
如仲尼儒術始流芳於沂水之湄元凱戰功方掛美

於峴山之頂愚實何効遂叨此榮司空念切憂忘事
諧響應猥垂恩力妙選書工所謂知臣者莫若聖君
成我者固須良友有始有卒念茲在茲彼雖未起雕
鏤此已先深銘鏤今者干戈務擁筆硯事疎不及別
請他人敬遵來命唯望早成刊勒實賴獎憐其碑詞
同封呈上云云

第二

錄溫者包藏異謀玷污玄化螻蝻暫成聚窟鳴梟貴
欲同巢誠謂天高可欺不知日遠能照果彰罪跡遂
舉刑書既絕慮於竊鈇俾成規於用鉞言堪自賀事

必相傳豈料司空染五色毫飛一函紙徵美詞於魯
史辱虛譽於劉牋列土除兇不負國章在手臨風拜
賜其如戎律拘身未啓素誠但銘殊貺

第三

揚示詔書仰窺聖旨佇攀高躅倍激壯懷司空寄綰
吳門瞰懸魏闕况奉臣哉之命必興王者之師但希
水簇舟舡幸遵舊俗山堆戈甲早振雄威副大君旰
食之勤慰下走朝飢之望某祇看風信便泛江程五
兩翩翩解指朝天之路三軍踊躍待申破竹之功許
接後塵遠示行日儻可從心所欲必希攜手同行王

導有言無作楚囚相對劉琨養勇以誅逆虜爲期事
可榮今功何讓古旣銜帝語勿老師徒願因江漢之
征得遂瀟湘之遇云云

第四

伏以山岳降靈尹吉甫之全德風雷奮氣竇世寧之
異祥况乃景值新秋時當聖代間生英傑高建勳庸
伏惟相公名可掩瑜志堪奪璧魏公子春霆振響有
物皆驚晉大夫冬日流輝無人不愛深蘊安劉之業
終成佐漢之謀今則又慶生辰永資景福出握元戎
之柄旣播嘉聲入持宰相之權則迎急詔禱祝攀戀

不任下情有少續壽之儀謹具別狀寄獻云云

第五

專使押衙傅遜至啓閱華緘奉承珍貺光輝奪目荷戴銘心况承已奉堯言永除回怒繼好息民之義遠耀麟經輸忠報主之誠頻傳鴈訊喜氣連鋪於兩岸嘉聲遍振於四鄰敬仰成規深敦曩契唯願內防謁譖外息狐疑必期勩力於公家不敢欺心於閤室伏惟深賜云云

宣歙裴虔餘尚書

今月十六日裴校書至伏蒙深追曩顧迥黜違言捐

之以榮賤辱之以好幣情敦刻畫無非譽過之詞事繫琢磨宛是愛忘之眷既多受賜永切銜知不審自履閨秋尊體何似伏想蟬噪暮景鶴叫晴空樓下長溪閱政聲而不息窓中遠岫引詩思以無窮伏惟侍膳之餘公退之暇精加保愛佇俟寵徵某早願攀嵇近蒙善鄭深祝瞻望豈任下情云云

第二

去年因景氏子有小人言讒誣之事多興噂嗜之詞不少動成忌器久阻親仁昨以戎首既摧禍胎自剖遂脩舊好聊達微誠伏蒙尚書特請嘉賓遠賚厚幣

桂苑筆耕卷九
俾息四方之笑永通兩地之歡捧嘉貺而增榮窺雅
言而竊抃况對蓮池之客實逢桂苑之仙自此句渚
清波已能流惡隋河遠派亦得洗瑕鍊多而既識金
精燒罷而共知玉冷伏惟仁鑒俯察愚衷云云

第三

當司宣歙院被浙西越局侵權差官奪務以強自恃
謂暴無傷仰計通仁備詳深弊今者鹺務却仍舊貫
已有詔書浙西雖近宋聳固殊魯瘠只解租庸副職
尚提招討兵符宜慙已往之非用結將來之好竊知
猶尋亂轍愈弄雄權再署周正罔思唐令宣歙院上

違聖旨下阻羣情實虧臣子之誠豈追鬼神之怒既
失用和爲貴唯知長惡不悛伏望尚書洞察事情俾
全理體雖知秦鏡固無遺鑿之虞或恐齊竽猶有濫
吹之者能摧狡妄遠托威嚴亦慮官吏驚疑必望深
加撫恤幸甚

壁州鄭凝績尚書

賢尊相公不聞庸虛早垂眷顧每念攀鴻之懇頻傳
繫鴈之書動皆陶侃之手蹤曾非陳遵之口占寶玩
而字終不滅何翅三年輝榮而恩有所從倍賢十部
况與尚書頃依鳳里已覲龍章清談深仰於阿戎異

禮得攀於侯昱高山仰止何日忘之今者遠辱榮緘
過垂虛譽永言抃荷但務鐫銘云云

第二

某素無材術謬荷寵章頃握兵權方舉上將軍之令
爰沾睿渥叨承大司馬之榮仰覩鳳書深慙豹略此
時未審尚書躡八花塼之影綴五色筆之詞刻畫恩
深游揚意重不獲早申感激遠謝褒稱又奉華緘方
知麗藻雖早榮紙貴固無愧於士安而每想筆乾實
有慙於玄照既多闕禮何贖深辜伏惟眷私終賜恕
察云云

太保相公鄭畋

自承相公大郎再持廟筭大庇藩條况蒙特假陶勻
正歸權筦雖則魯爲長府仍舊貫之言行其如晉閱
被廬作新軍之意切未能措手尋見移權凡所阻難
自能審度遠垂批示倍荷恩私如愚者焉所獲多矣
敢速官謗有負親知伏惟鑑察謹狀

護軍郃公甫將軍

某用舍行藏唯遵帝命始終去就冀洽羣情仰酬萬
乘之知豈計一朝之忿昨者繼窺天旨更勵冰心遂
令專介傳書願得近鄰釋憾周相公似能遵稟免致

悔尤既知蘧瑗之非必息廉頗之怒一帶水永除多
梗九重天實鑑忠誠自此日聆鷄犬之音風識馬牛
之性往來無壅彼此相成斯皆將軍遠贊睿慈旁均
和氣共成美事但荷深仁特辱芳緘過垂虛譽銘戴
慙惕豈任下情

第二

特垂寵示過辱獎詞竊知將校官寮三軍百姓共陳
衆狀請發奏章以爲煙塵自起於四郊塗炭遍加於
九野唯有斗牛之境稍無戎馬之災此實地分所招
天心見庇蓋烝黎之福也何功力之有焉豈料將軍

過聽衆詞助成美事欲煩錄奏特賜傳言然以拙政
而誘羣情以虛言而干聖鑒固爲不可實所難當伏
惟終寢奏論俾速官謗便同受賜非敢矯言伏惟允
察云云

第三

特辱華緘猥傳吉語初驚善謔終荷深仁某每省庸
虛過沾寵寄未能報主豈至封王雖漢代諸侯亦流
恩於異姓而周書列爵須示賞於殊勳曾無剖竹之
聲詎有分茅之望既非實譽必恐虛傳但慙眷私未
敢陳謝云云

前左省衛增常侍

忽奉榮緘特垂善謔宣父則欽遵三益老君則唯贈一言仰銜成我之恩但抱起予之歎自常侍遠勞仙騎俯顧弊藩竊承久陟道途倦垂軒蓋戀德而披雲尚阻懷誠而啓露未期每憶笑談莫勝飢渴某也早以勤行至道唯希翊贊聖朝張良正遇於漢恩敢言絕跡范蠡未除其越恥詎欲逃名非求八百歲以成春但讀五千言而勵節幸無大故且恕小瑕方願惠然肯來豈將率爾而對云云

泗州于濤尚書

蠢彼徐戎聚茲餘燼敢侵貴境再逞姦謀只應來就誅夷固可立期撲滅况尚書德超定國威跨栗磳妙略防危實知孺子可教強隣結憾是表忠臣不和去年旣振雄威今日更資茂績此已徵驅衆旅救援仁封永言牙爪之勤須託指蹤之妙願諧羣望暫屈長才輒敢請充都指揮使仰俟一呼之命同成九拒之功冀耀兵權早燔寇黨得脫齊桓之恥唯憑卻縠之賢伏惟眷私深賜照察

第二

昨者竊聆有拔城之議遂申忠告冀保遠圖伏奉廻

緘得窺深旨且徐戎肆虐固非楚子之能泗俗懷忠
不比蕭人之怯欲謀自潰何謂克終雖云有慮於防
川豈可潛思於坐井某近奉詔旨頗促軍期即得經
過貴州便可剷除寇壘未見殷輪之苦且更勉旃其
於沃釜之言已承命也他具前狀此不繁陳云云

桂苑筆耕集卷之九

桂苑筆耕集卷之十

別紙二十首

魏博韓簡侍中

鄂州崔紹大夫

考功蔣泳郎中

前泗州鄭廉常侍

新羅探候使朴仁

範外員

蕭邁相公二首

田軍容

都統王令公賀冬至

浙西周寶司空

前宣歙裴虔餘尚書

幽州李可舉太保五首

徐泗時司空

田令孜軍容送器物

振武赫連鐸尚書

謝馬狗

幽州李可舉大王

魏博韓簡侍中

一自黃巾北侵翠輦西幸蝗無避境蟻已壞堤內無
宮闕之災外結藩維之恥諸葛爽者豕食難飽豺聲
易驕却躡迷途敢凌貴圉侍中手驅虎隊心閱豹韜
一陣纜施三城遂復雄功始建冊命俄臨永爲壯士
之盛談別作諸侯之美事某昨欲剖巢燠穴久爲淬
甲勵兵及出師徒又蒙詔旨且令利權山海鎮壓江
淮一弭國讎先資邦賦然其奈夜眠軍幕霜橫枕上
之戈曉掛戎衣雷吼匣中之劍終願親揚勇略靜滅
兇徒伏惟鑑察

鄂州崔紹大夫

遠蒙仁私特示表藁其於歎仰無以喻陳某夙練戎
韜願裨王略不愧於管天錐地猶勤於撮壤導涓遂
敢累貢忠誠冀迴聖鑑儻或六龍下峽豈同五馬渡
江中朝之禮樂無虧下武之功猷斯在果蒙大夫惠
於宗族贊以表章過垂華袞之褒益睹彩毫之妙古
詩云不惜歌者苦但傷知音稀今日知音幸遇之矣
然榮示中媿茂弘之德業齊越石之機謀自顧瑣才
何當虛譽今則王導清望已推於首座相公劉琨至
誠亦付於襄陽僕射必期英鑑永察愚衷云云

考功蔣泳郎中

特勞專介忽辱榮緘過垂軒冕之褒永寘巾箱之寶
實慙彼已豈敢當仁郎中學士暫避韞時偶勞僑跡
今者官清司績職峻集仙麟趾殿中久侍驂鸞之客
螭頭階上則親吐鳳之才豈唯舉四善之精詳蓋必
備九重之顧問鋪陳組繡演暢絲綸則也虞夏商周
之書重行聖代蕭曹魏邴之位更屬何人詎可守三
徑之寂寥慮千山之險阻許垂訪別專冀祇迎伏惟
眷私幸賜鑑察

前泗州鄭廉常侍

竊以寇戎未殄士卒多驕凡曰郡侯實難政理縱得

上和下睦猶爲朝是夕非况福乃儻來禍惟不測但
無慙於屋漏亦何累於國恩然而常侍蓋切奉公匪
疎撫士雖云驚擾終免侵傷有以見爲政無私當仁
有裕伏承已離泗水始及淮山捧閱來緘摛謙往咎
其於瞻仰胡可弭忘然則郡守懸魚旣繼古人之節
塞翁喪馬可寬達士之懷云云

新羅探候使朴仁範員外

忽奉公狀備睹忠誠慰愜欽依但增衷抱員外芳含
雞樹秀稟鼇山來登天上之金牌桂分高影去陟日
邊之粉署蘭吐餘香今者仰戀聖朝遠銜王命捧琛

梅苑筆耕卷十
執贄棧險航深能獻欵於表章欲致誠於官守雖無
奉使難在此時九州之侯伯傾心萬國之臣僚沮色
幸來弊鎮得接清規况奉貴國大王特致書信相問
將成美事不惜直言儻員外止到淮壩却歸海徼縱
得上陳有理其如外議難防無念東還决爲西笑聖
主方深倚望賢王佇荷寵榮道路亦通舟舡無壅勿
移素志勉赴遠行峽中寇戎或聚或散此亦專令防
援必應免致驚憂且過鬱蒸可謀征邁館中有闕幸
垂示之所來探候事已令錄表申奏敬惟鑑察

蕭邁相公

某累貢表章請議巡幸忠誠屢罄宸睭未廻冀保始
終再陳利害匪望河陽之狩願迎汾水之遊竊以諸
道賦輿皆遵峽路多是慨五致一蓋已萬水千山後
網不繼前綱所貢不如所費况近者西從蜀國南至
荆門似有微災恐遺巨患忽若草寇侵據江陵阻艱
則榛梗旣多苞茅莫入或更蠻戎伺隙必令越巂勞
兵避柱觸楹防微可誠行舟墜劔執滯固難某以孝
子不諛其親忠臣不諂其主遂陳狂瞽遠贖聖聽唯
望略泛龍舟暫遷鳳里庶使九州修貢不愆任土之
宜四海歸仁盡遂朝天之望且賊巢兇狂聚衆穢贖

經時縱能早覆妖巢豈可便迴法駕淮南乃寰中俗
富聞外名高喻以金甌永無釁缺比於玉壘實異繁
華伏惟相公居注意之朝處沃心之位周成王之卜
洛始託姬公晉元帝之渡江終資仲父早申決議仰
贊宸衷能成可久之規益表無私之德某頃在西川
制置及於南詔通和雖爲先察於微豈欲驟稱其伐
但緣相公皆垂目驗不敢面欺則今日荆蜀災星未
能退舍吳楚福地實可遷都事歸從權化資垂拱永
致一家之理必輸萬里之誠某言不近誣志唯遠慮
非奪日官之業冀垂天子之恩幸望國僑無譏裨竈

謹以具表陳請訖伏惟云云

第二

伏以物忌太盛器滿必傾自古有言至今爲誡苟或
不能知止但欲貪榮則有折鼎足之虞炊劔頭之險
某每念遭逢聖運紹續舊勳北定羌戎南征蠻蜚東
降齊盜西建蜀城高提三尺之權粗展四方之志然
自煙塵聚擊原野宿兵曾無敦閱之全材先叨統帥
詎有縱橫之令策兼領利權而乃不能首唱義聲身
先銳旅戮奔鯨於海澤逐獠犬於秦關遽及火熾祠
篝火驚御輦遠聆巡幸便議征行但以每當誓衆之

時卽奉止軍之詔雖自始終勵節其如進退失圖華元興城者之謳子產致國人之謗乃有浙侯構隙沛將加兵三年已來二憾不釋蝸蟻競噪蚌鷸相譏厚誣而巧弄舌端顯奏而亂搖心曲求刺舡而不暇想投杼以難逃伏賴相公照以秦臺調之伊鼎察邾公之愬鄭伯解晉帝之疑石苞免挂刑章尙縻寵秩旣蒙明洗誠合淬磨更修克己之心永竭勤王之力直以松筠不改雖自保於堅貞蒲柳先秋遽已傷於衰暮筋骸漸憊志氣潛摧縱欲自強終憂不逮今者幸遇上京已復大駕則迴麟鬪龍吟固息興妖之慮放

牛歸馬實迎偃武之期某也旣在清時誠爲棄物况縈沉痼深負壯圖攬鏡無憊投簪是念豈慕祈奚請老尙處冗員唯思范蠡愛閑得行素意乞解所職自卜爲宜伏惟相公選士惟賢退人以禮俯矜羸劣特賜允從雖慚未遂報恩免更久爲尸祿仰干陶冶敬託牋毫始知調急聲哀唯愧詞窮理盡伏惟俯賜恩鑑

田軍容

某慙無術略久竊榮寵提漢法之重權陟秦官之極品莫申展効何贖貪叨况自寇盜奔侵京都陷覆久

守咽喉之寄不成毫髮之功雖兵柄既多固難措手而君恩未報實切覲顏况乃室怒潛興鄰讎競起陸遜徒稱其佳吏崔暹終憾於癡人顯奏相誣多言可畏幸蒙軍容推心庇護極力保持雖遭貝錦之詞免陷織羅之罪祇合以戀軒思幄策蹇磨鉛畢命爲期在公無倦但緣攝生罕妙從役久勤齒髮既衰精神亦耗少私寡欲敢言君子者乎多病愛閑方謂古人是也智力不可強進寵章不可濫行實覺妨賢只宜求退今者肅清鳳闕撲滅梟巢彘弓矢以銷兵永除戎備垂衣裳而致理廣任賢才如某者寒灰罷燃智

井誰顧往歲之南征北伐雖忝當仁此時之尸祿素餐逾慙非據既失行驅十乘豈能臥護六軍輒貢表章懇辭爵位伏惟軍容察以有犯無隱之義難進易退之規仰贊帝俞俯從愚願敢有脅肩譎笑固無沒齒怨言幸逢四海之昇平願指一丘而養老干黷清德兢惕實深伏惟云云

都統王令公賀冬至

伏以律管潛吹星躔改候觀臺望瑞雲物呈祥伏惟令公每布祥雲常懸愛日三軍殫弩挾楚續以忘寒五夜枕戈擁孫衾而達曙必資景福早建殊功惟當

相考錄卷十
肅殺之時便遂討除之勢四方聳耳佇聆大捷之音
萬乘傾心永致中興之運某末由陳賀但切禱祈

浙西周寶司空

伏以禮慶履長傳標視朔夷夏契混同之運乾坤叶
交泰之期伏惟司空相公浙水流恩吳山變俗既睹
趙衰之日永洽物情願親傳說之星早環帝座末由
拜賀但切禱祈云云

前宣歙裴虔餘尚書

伏以禮稱迎日傳載書雲當寰中賀聖之晨是水外
寢兵之際宜陳善祝仰薦殊祥伏惟尚書政報褰帷

慶資溫席已捧徽黃之詔固諧夢說之期人仰板輿
羨老萊之榮養帝畱金鼎待伊尹之來調某雖戎律
拘身而清規在想末由拜賀但切禱祠

幽州李可舉太保

碾玉排方腰帶壹條並金魚袋壹枚金花銀
合盛重一百六十兩

右件腰帶體資廉潤功就琢磨雖慙鄂坂之金稍勝
延陵之縞珪璋比德宜親佩劍之腰霜雪呈華願近
生松之腹動則金章躍鯉靜乃寶匣盤龍既當屈以
求伸唯望服之無斃謹專寄獻遠表依攀伏惟恩私

特垂檢納

銀結條燈籠一枚

承燈蓋白盛荷葉一漆木匣盛金銅鑲鑰並全

金花平脫銀裝硯臺一具

垂鈞香囊五枚漆木匣盛金銅鑲鑰

全具

金花平脫銀裝硯匣並硯几一具

銀硯水瓶等四事硯

凡在第二匣內

右伏以持異物而奉異人嘗聆斯語覽遠書而愧遠客亦驗古詩志常切於攀鴻事不慙於獻鵠每逢珍玩則繫懇誠前件燈籠硯臺等鑄鑲成功披砂潤色運巧而靈絲綴藻標奇而霞蘂雕華高懸謂雲蓋凌

風遙視疑露盤含日龍膏豹髓偏宜卜夜於歡筵鳳筆鵝牋亦可依仁於末席加以謝囊分掛孔硯深藏虛心而只待含香蘊器而終能處默是敢徵美言於舉燭寄微慊於濡毫伏惟無思宋殿葛籠僻敦儉約或逞張旭草聖許近恩輝必可遠耀九光深滋五色隔飛蛾而救物仁化彌彰研含麝以傳書德馨增馥非無所採粗有可觀必望眷私俯垂容納幸甚云云

金花陷銀柘裏合大小共三具

銀接頭紅牙匙筋一十對

犀杓子四隻已上大合內盛銀裝茶碗四隻

在中合
內盛

犀牒子二十片在小合內盛金花銀脚螺杯
一隻

右件匙筯犀合茶碗螺杯等雖愧金盤粗勝棘匕鈿
玫瑰之表異固讓魏銘詠玳瑁之標奇敢徵潘賦所
貴者煙排翠點霞染纖條掌握增榮不慮劉使君見
失指蹤任意或希柳御史自攜况乃水族殊姿天成
雅器永免蜘蛛寄跡能將鸚鵡齊名稍謂珍奇遠思
寄獻伏惟靜籌帷幄許接罇罍對郭隗於高臺深傾
露液遣甘需於仙闕勝醉霞漿伏惟恩私特賜檢納

幸甚云云

織成紅錦繳壁兩條 暖子錦三疋

被錦兩疋 西川羅夾纈二十疋

真紅地絹夾纈八十疋

右件繳壁錦纈等龜城傳樣鳳杼成功張廣幅而宛
見虹舒疊綵繪而免慙鮫織雖五十里之誇步障則
難可爭光而四十疋之製戎衣則或堪入用亦冀備
會稽守晝行之服換平津侯夜寐之衾不咎輕微特
垂容納干浼斯甚兢慙實多云云

安南開海路圖一面

西川羅城圖一面 並八幅紫綾緣

右竊以事畏人知功慙自銜孟側奔殿終著美於魯
論郗至驟稱果興譏於晉乘妍媸可鑒今古何殊頃
者銅柱南標金墉西建開八百里之險路則雲將驅
石雷師劈山築四十里之新城則水神滲泉地媪供
土蓋乃感忠誠於上鑑標壯觀於外藩敢言簡在帝
心實匪率由人力今則八蠻歸化萬乘省方既能有
備無虞亦所當仁不讓去年嘗傳雅旨欲覽微功乃
徵於墨妙筆精遍寫彼長途峻壘宛如縮地不止移
山遠遣寄呈略希展閱必謂桂陽衛颯誠瑣瑣焉亦

知蜀國張儀是區區者恃深眷而不拘小節激壯圖
而無訝大言伏惟云云

徐泗時司空

物色

右伏以縞帶紵衣魯史乃先其所出投桃報李周詩
用表於相知永言沼沚之毛豈讓琅玕之寶蓋防闕
禮只貴申誠前件物等雖曰土宜亦由波及實慙華
麗况至尠微難把八行盡寫傳心之語唯憑一介聊
陳藉手之儀伏惟眷私特賜檢納云云

田令孜軍容送器物

右竊以氛曠未銷道途尚梗久乖專信略達微誠每
憂於遠莫致之不敢以多爲貴者前件器物貨非難
得器實易盈雖慙鏐銑之名願接罇壘之列輒將寄
獻遠表依攀伏望無掛意於四知幸流恩於一諾特
垂容納云云

振武赫連鐸尚書謝馬狗

右特蒙眷知遠有惠賚無庾亮的顛之害有陸機黃
耳之能敢謂備於左牽右牽實爲馴於執勒執縶寧
唯致遠况解防姦旣驅策之有期固指蹤而無失仰
承重貺倍荷殊私末有報酬益多愧悚伏惟云云

幽州李可舉大王

青氈帳一口 金銅裝鉸具

右伏蒙恩私特賜惠賚委之專介衛以壯夫遙陟危
途得張官舍不假棟梁交構能令戶牖全開出觀則
一朵蓮峯入玩則千重錦浪加以頂標曉日額展晨
霞靜吟而筠箔搖風俯視而地衣鋪雪舒卷皆成其
壯觀行藏永佩於深仁莫不銜沙漠之奇模駭江淮
之衆聽臥龍竊譽固當高枕無憂虜豹成功必可運
籌決勝唯期尅捷全賴庇庥荷戴所深啓陳何及伏
惟云云

桂苑筆耕集卷之十

